

11. *Nov. 1624*

Chamb. de just.

DECLARATION

C 203

DV ROY, PORTANT
L'ORDRE QUE SA MAIESTE'
veut estre obserué pour la recher-
che des abus & maluersations com-
mises au faict de ses Finances.

11. Nouemb. 1624.

*Verifiée en la Chambre de Justice, le sei-
Ziesme Novembre 1624.*



A PARIS,

Par FED. MOREL, & P. METTAYER,
Imprimeurs ordinaires du Roy.

M. DC XXIIII.

Avec Priuilege de sa Majesté.

THE NEWBERY
LIBRARY
Case
F
39
326

1624 fso

THE NEWBERY
LIBRARY



NOVIS par la grace de Dieu Roy de France & de Nauarre: A tous ceux qui ces presentes lettres verront, Salut. Par nos Lettres Patentes en forme d'Edict, du mois d'Octobre dernier, nous auons erigé & estably vne Chambre de Iustice pour la cognoissance & iugement des abus & maluersations commises au faict de nos Finances. Et combien que nos Ordonnances & les Reglemens & stils de nos Cours contiennent amplement les regles & les formes qui se doiuent obseruer en la recherche & punition des crimes: Toutesfois pource que la cognoissance de nostredite Chambre s'estend par tout nostre Royaume, & que l'artifice de ceux qui ne laissent pas de commettre lesdits crimes nonobstant la defense des Loix, & le deuoir de leurs consciences, inuentent tous les iours des manieres nouuelles pour se couurir, & faire que la Iustice ne les puisse conuaincre par l'vsage des formes ordinaires, Nous auons estimé qu'il estoit conuenable de declarer plus par-

ticulierement, & faire sçauoir à tous quelques poincts principaux de l'ordre & procedure que nous entendons estre tenue par les Iuges de ladite Chambre, pour preparer & esclaircir les preuues & paruenir plus aisément à la conuiction de ceux qui sont vrayement coupables. A CES CAUSES, de l'aduis de nostre Conseil, & de nostre certaine science, pleine puissance & autorité Royale, par ces presentes signées de nostre main, pour n'obmettre aucune chose de ce qui est necessaire pour le bon reglement de nostredite Chambre, punition desdits abus & maluersations, non seulement de celles commises depuis le dernier iour de Septembre mil six cens sept, mentionnez en nostredit Edict: mais aussi de tous les cas reservez & non compris par les reuocations & abolitions precedentes, (à la verification & poursuite desquels nous voulons & entendons estre procedé par ladite Chambre & nostre Procureur general en icelle.) AVONS ENJOINT & ordonné, enjoignons & ordonnons à tous nos Baillifs & Seneschaux, Lieutenans generaux & particuliers, & tous autres nos Iuges; qu'incontinent & sans delay ils facent publier en leurs sieges en vertu de ces presentes & de l'or-

donnance de ladite Chambre, nosdites lettres du mois d'Octobre dernier, Et en consequence d'icelles, publier & afficher par les places & lieux à ce accoustumez des Villes & Bourgs de leurs Iurisdctions, Que toutes personnes de quelque estat & qualité qu'ils soient qui auront à faire des plaintes sur les abus & maluersations commises en nos Finances, tant par suppositions de noms, prests, achapts, ouurages, voyages, ports & voitures de deniers, perte, conduite d'Artillerie, doubles escroïes ou contraintes, & quittances d'aucuns Tresoriers, Receueurs, Controolleurs, leurs Clercs, Commis ou entremetteurs, Compositions faictes sur les comptans, acquits patens, mandemens, rescriptions, assignations, ou pour auoir delay de payer, commutations d'especes ou billonnement, rebuts de deniers, leuées induës & contre les Ordonnances, ou autrement en quelque sorte & maniere, & contre quelque personne que ce soit, qu'ils ayent à les apporter ou enuoyer au Greffe de nostredite Chambre, & viennent en icelle en toute liberté, sauf à faire droict à ceux qu'il appartiendra sur la restitution des deniers induëment exigez, ou cedulaes & obligations feintes ou simulées, si le cas y eschet: Et pour ceter

effect, nous les auons mis & mettons en nostre sauuegarde, faisant inhibitions & defences à toutes personnes de les destourner ou intimider, soit par menaces ou par quelques autres voyes directes ou indirectes sur peine de la vie. ENIOIGNONS pareillement à tous nosdits Iuges, & tous autres nos Officiers lesquels nous commettons à cét effect, que si tost qu'ils en seront requis par quelques personnes que ce soit, ils ayent en vertu de ces presentes, & sans attendre autre commission à informer des abus commis en nosdites Finances contre toutes personnes, sans aucun en excepter, decreter le plus promptement que faire se pourra, & se saisir des personnes qui se trouueront coupables desdits crimes, ensemble de leurs registres, papiers & comptes, nonobstant oppositions ou appellations quelconques, & sans preiudice d'icelles, & enuoyer en diligence lesdites charges & informations par eux faictes, ensemble lesdits papiers, registres & comptes au Greffe de ladite Chambre. ENIOIGNONS à tous tesmoins de comparoir à la premiere assignation qui leur sera donnée, pour porter tesmoignage en vertu des commissions de ladite Chambre ou autres Iuges par nous commis, comme dict est, à peine de cinquante

te escus d'amende pour le premier refus, & pour le second de punition corporelle s'il y eschet, ce qui leur sera déclaré par le premier exploict qui leur sera fait. EN IOIGNONS aussi à tous Iuges, Greffiers, Huissiers, Sergens ou autres personnes, d'apporter ou enuoyer au Greffe de ladite Chambre, dans quinzaine apres la publication des presentes, toutes les informations, procez verbaux & procedures estans entre leurs mains ou Greffes, faictes touchant lesdites suppositions & compositions, crimes & delicts susdits, circonstances & dependances. EN IOIGNONS à tous Huissiers & Sergens si tost que les Commissions, Decrets & Arrests de ladite Chambre leur seront presentez contre les accusez ou condamnez, mettre iceux sur le champ & sans delay à execution, à peine de priuation de leurs Estats. Et à nos Procureurs en chaque siege souz mesmes peines, qu'ils tiennent la main à l'execution des presentes, selon leur forme & teneur, & enuoyent dans huitaine apres la reception d'icelles les procez verbaux desdites publications, pour y estre par nous pourueu ainsi qu'il appartiendra. ET D'AUTANT qu'il y a plusieurs années que nous auons fait cōgnoistre l'intention que nous auons

de faire ladite recherche, mesmes decerné plusieurs Commissions particulieres à aucuns de nos Officiers, pour informer desdits abus, tant generalemēt & indefiniment, que contre aucuns particulieremēt denommez, suiuant les diuers aduis & plaintes qui nous en ont esté faictes par plusieurs qui en auoiēt particuliere cognoissance, que depuis ce temps-la, ceux qui les ont commises ont essayé par diuers moyens d'en estoufer la cognoissance, & d'en detourner les preuues, ou pour le dernier remede faire en sorte que s'ils en estoient recherchez & conuaincus, l'exaction des amendes & condamnations qui interuiendroient contre eux, fust rendue impossible, obscurcissant leurs affaires par plusieurs contractz, cessions, transports, contrelettres, & autres actes simulez; N o u s auons déclaré & declaronz nuls & de nul effect & valeur tous lesdits actes passez en fraude par ceux qui ont esté & seront accusez ou deferez, leurs Clercs & Commis, & ceux qui ont esté employez par Commission. Voulons que sans auoir égard à tous lesdits actes, nosdits Iuges ayent à passer outre à l'exécution des Iugemens qui seront par eux donnez pour raison desdits abus & maluersations depuis ledit iour dernier Septembre

bre mil six cens sept, mentionnez en nosdites lettres : Et de tous les cas reseruez & abolis par les reuocations & abolitions precedentes. V O U L O N S en outre que tous les accusez ayent à bailler pardeuant nosdits Iuges vn estat par le menu des biens à eux escheuz par les successions qu'ils ont recueillies, & des acquisitions qu'ils ont faictes; & autres biens generalement par eux possédez, soit en leurs noms ou souz le nom d'autrui, & l'affirmer souz peine de confiscation, non seulement de toutes les choses obmises, mais aussi de tous les biens qui se trouueront par eux acquis depuis qu'ils ont esté pourueuz d'offices comptables, & de punition corporelle, pour en iugeant lesdits procezy auoir par nosdits Iuges tel égard que de raison. E N I O I G N O N S pareillement à tous ceux & celles qui ont presté leurs noms ausdits Officiers de Finances, & commis à icelles, pour quelques obligations, contracts d'acquisitions de nos droicts, heritages, rentes & autres choses quelconques, soit que l'on ait suiuy leur foy simplement, ou qu'ils en ayent donné des contrelettres souz sein priué, ou pardeuant Notaires ou autres personnes publiques, qu'ils ayent à le venir declarer au Greffe de nostredite Chambre, ou

pardeuant nostre Procureur sur les lieux , dans vn mois apres la publication des presentes , faicte es Sieges & Iurisdiccions de leurs domiciles , à peine d'estre condamnez en leurs noms au payement des sommes ou valeur des heritages & choses contenues es actes esquels ils auront interposé leur nom , & autres plus grandes fil y eschet. E T D'A V T A N T que plusieurs desdits Officiers, mesmes ceux qui d'ordinaire sont les plus coupables, mettent leur principale defense en la fuite, esperant que les condamnations qui pourront interuenir contre eux pendant leur absence seront difficilement executées, au moyen des traueses & empeschemens qu'ils y preparent, & en tout cas que dedans les cinq années desdites condamnations, ils pourront r'entrer dans leurs Offices & biés, nonobstant les adiudications & confiscatiōs d'iceux: N o v s auons en consequence de l'Ordonnance du Roy François premier, dict, & ordonné, disons & ordonnons, voulons & nous plaist que les Iugemens & condamnations qui interuiendront par contumace contre aucuns desdits Officiers & autres susdits, pour raison desdites maluerfactions, ou qui ne se trouuerront auoir rendu leur compte dans le temps porté par les

Ordonnances, soient pleinement executez. Et qu'en ce faisant il soit par nous pourueu ausdits offices, sãs que cy apres pour quelque occasion que ce soit ils y puissent r'entrer. Et pour le regard de leurs autres biens, voulons & ordonnons qu'à faute de se représenter par les condamnez dans six mois, du iour desdites condamnations, les confiscations des biens par eux acquis depuis qu'ils ont esté pourueuz d'offices comptables, demeurent purement & incommutablement acquises à nous ou à qu'il appartiendra, sans aucune esperance d'y pouuoir r'entrer apres ledit temps, pour quelque cause & occasion que ce soit, mesmes en consignât les despens & amendes, & en quelque autre sorte & maniere que se puisse estre, nonobstant les Ordonnances precedentes qui donnent le terme & espace de cinq ans aux condamnez par contumace, ausquelles nous n'entendons estre compris ceux qui manifestement enrichis des despoüilles de nostre peuple & de nos Finances se rendent par ceste fuite clairement conuaincus de peculat & vol public de nos deniers, ausquelles Ordonnances, en tant que besoin seroit, nous auons pour ce regard derogé & derogeons par ces presentes, sans preiudice des poursuites, saisies, ven-

es & adiudications par decret sur leurs autres biens pour le payement des amendes & restitutions esquelles ils aurōt esté condamnēz. **V O U L O N S** & ordonnons que tous les deniers qui prouiendront desdites condamnations, confiscations, Offices & autres biens, deduction faicte du droit qui sera adiugé aux denonciateurs, & des restitutions que nosdits Iuges trouueront raisonnable de faire aux particuliers, soient mis par le Receueur par nous commis es mains du Tresorier de nostre Espargne pour estre assignez aux plus importantes affaires de nostre Estat, nonobstant tous dons que nous pourrions faire desdits biens, partie ou portion d'iceux deniers ou Offices, lesquels nous auons declarez & declarons nuls & de nul effect & valeur. **E T A F I N** que la preuue & cognoissance desdits abus se puisse plus facilement auoir, & n'obmettre aucun moyen d'en descouurir la verité, outre ce que nous auons cy dessus ordonné pour les Iuges des prouinces, Permettons à nostredit Procureur general en ladite Chambre obtenir & faire publier par tout ou il apparten dra, les Censures & Monitions en tel cas requises & accoustumées, **V O U L O N S** que suiuant nostredit Edict il soit procedé par


l'un des Iuges de ladite Chambre aux informations & auditions des denonciateurs & tesmoins, le plus promptement que faire se pourra, prenant mesmes leurs Clercs pour Greffiers. PERMETTONS aussi à nostredit Procureur general, aux occasions pressantes, & où il y aura danger d'evasion de faire arrester ceux contre lesquels il aura receu des plaintes, accusations & denonciations, & iceux faire constituer prisonniers. Et pour éviter aux longueurs, voulons que nostredite Chambre ayt à deliberer & decreter, si besoïn est, sur les minuttes des informations, sans attendre qu'elles ayent esté grossoyées. ENJOIGNONS à ceux qui ont esté employez aux negociations & entremises des compositions & traictez frauduleux & prohibez pour raison de nosdites Finances, assignations, rescriptions, mandemens, quittances & autres actes lesquels y peuvent estre employez, sans cognoistre qu'il y eust fraude, & que ce fust traicte & negociation defendus, & y ont de leur part procedé de bonne foy, selon la charge qui leur a esté baillée de la part de ceux qui les employoient, Qu'ils ayent à en dōner aduis à nostredit Procureur general, dans quinzaine apres la publication des presentes, à peine

d'estre eux mesmes condamnez comme coupables à la restitution des sommes qui ont esté remises ou quittées par leurs negociations, & de telle punition qui sera arbitrée par nos Iuges, Ausquels nous mandons faire & adiuger telle recompense qu'ils verront estre raisonnable ausdites personnes qui se viendront decourir de bonne volonté. **DEFENDONS** à tous nos subjects sur peine de la vie de meffaire ny medire aux personnes susdites, & à tous les denonciateurs, lesquels à ceste fin nous auons pris & mis, prenons & mettons en nostre sauuegarde & protection speciale. **DEFENDONS** à tous Huissiers & Sergens d'attenter à leurs personnes souz pretexte de quelques contraintes par corps que l'on pourroit auoir obtenues contre eux au preiudice des defenses particulieres que nous accorderons à chacun d'eux sur les certifications de nostredit Procureur general, & pour le temps porté par icelles. **DEFENDONS** aussi à tous lesdits denonciateurs, tesmoins & autres qui ont eu cognoissance ou communication desdites fraudes & abus, d'accorder, composer & transiger avec les coupables ou autres personnes pour eux directement ny indirectement à peine de punition corporelle, & de

confiscation de tous leurs biens. SI DON-
 NONS EN MANDEMENT à nosamez &
 feaux Conseillers les Iuges de nostredite
 Chambre de Iustice, que ces presentes ils
 facent registrer au Greffe d'icelle, & le con-
 tenu cy dessus, garder & obseruer de point
 en point selon sa forme & teneur: En tes-
 moin de quoy nous auons faict mettre nostre
 seel à sesdites presentes: Car tel est nostre
 plaisir. Donné à Paris l'vnziesme iour de
 Nouembre, l'an de grace mil six cens vingt-
 quatre, Et de nostre regne le quinziésme.
 Signé, LOVIS. Et sur le reply, Par le
 Roy, DE LOMENIE. Et scellée du
 grand seau de cire iaune sur double queue.
 Et à costé dudit reply est encore escrit,

*Leuës & registrées au Greffe de ladite Chambre, pour
 estre executées selon leur forme & teneur, sans preiudice
 du droit des vrais & legitimes Creanciers, le seiziesme
 Nouembre 1624. Signé, L A M Y.*

EXTRAICT DES REGISTRES de la Chambre de Iustice.

 *EV par la Chambre de Iustice establie par
 le Roy, pour la recherche & punition des abus
 & maluersations cōmises au faict deses Finan-
 ces, les Lettres patentes de sa Majesté adressantes à icelle
 Chambre, données à Paris l'vnziesme Nouembre, l'an*

de grace mil six cens vingt-quatre, signées, LOUIS: Et sur le reply, Par le Roy, De Lomenie: Scellées sur double queue du grand scel de cire iaune. Ouy le Procureur general du Roy, Tout considéré: Ladite Chambre a ordonné & ordonne que lesdites Lettres seront registrées au Greffe d'icelle, pour estre executées selon leur forme & teneur, sans preiudice du droit des vrais & legitimes créanciers: Et ce faisant, seront à la requeste du Procureur General du Roy en icelle, leues, publiées & registrées es Greffes du Chastelet de cette ville de Paris, & copies d'icelles Lettres collationnées à l'original, enuoyées par les Prouinces aux Substituts dudit Procureur General du Roy es villes de ce Royaume, pour à leur diligence icelles pareillement faire publier & registrer es Greffes des Prouostez, Bailliages, Seneschaussées, & autres Iustices desdits lieux, à ce qu'ils n'en prétendent cause d'ignorance. Et de la diligence qu'ils en auront faite, seront tenus en certifier ladite Chambre dans vn mois apres icelles receuës, sur peine d'en respondre en leur propre & priné nom. Fait en la Chambre de Iustice, le seiziesme de Novembre mil six cens vingt-quatre. Signé, L A M Y.

Collationné aux originaux des Edict, Cōmission, Declaration & Arrest cy dessus, par moy Conseiller du Roy, Auditeur en la Chambre des Comptes, & Greffier en la Chambre de Iustice sous-signé,

Lamy